

सौम्यः । सौम्यो हि ब्राह्मणः । पु॒स॒वा॒यै॒व सा॒वि॒त्रः । अथ॒
यद्वा॒र्हस्प॒त्यः । ए॒तद्वै ब्रा॒ह्म॒णस्य॑ वाक्प॒तीयं॑ । अथ॒ य-
दग्नी॒षोमी॒यः । आग्ने॒यो व ब्रा॒ह्म॒णः । तौ य॒दा स॒ङ्गच्छे-
ते ॥ १ ॥

अथ॒ वी॒र्या॒वत्त॒रो भ॒वति॑ । अथ॒ यत्सा॒रस्व॒तः । ए-
तद्वि॒प्रत्यक्षं॑ ब्रा॒ह्म॒णस्य॑ वाक्प॒तीयं॑ । निर्व॒रुण॒त्वायै॒व
वा॒रुणः॑ । अथो॒ यए॒व कश्च॑ सन्त्सू॒यते॑ । स हि वा॒रुणः॑ ।
अथ॒ यद्द्या॒वापृथि॒व्यः । इन्द्रो॑ वृ॒चाय॑ वज्रमु॒दय॑च्छत् ।
तं द्या॒वापृथि॒वी ना॒न्वम॑न्येतां । तमे॒तेनै॒व भा॒गधे॒ये-
ना॒न्वम॑न्येतां ॥ २ ॥

वज्र॑स्य वा॒रुणोऽनु॑मा॒नाय॑ । अनु॑मतवज्रः सू॒याता
इति॑ । अष्टा॒वेता॒नि ह॒वोऽपि॑ भ॒वन्ति॑ । अष्टा॒क्षरा॑ गा-
य॒त्री । गा॒यत्री॑ ब्र॒ह्मव॑र्च॒सं । गा॒यत्रि॒यैव ब्र॒ह्मव॑र्च॒समव॑-
रु॒न्धे । हि॒र॒ण्येन॑ घृ॒तमु॒त्पुना॑ति । तेज॑सए॒व रु॒चे । कृ-
ष्णा॒जिने॑ऽभिषि॒ञ्चति॑ । ब्र॒ह्म॒णो वा॒एतद्व॑क्सा॒मयो॑ रू॒पं ॥
यत् कृ॒ष्णाजि॒नं । ब्र॒ह्म॒न्नेवै॒नमृ॑क्सा॒मयो॑र॒ध्यभिषि॑ञ्च-
ति । घृ॒तेना॑भिषि॒ञ्चति॑ । तथा॒ वी॒र्या॒वत्त॒रो भ॒वति॑ ॥ ३ ॥
स॒ङ्गच्छे॑ते भा॒गधे॒येना॒न्वम॑न्येतां रू॒पं च॒त्वारि॑ च ॥